

Il fastiz dal Signuradi austriac a Domat

Theo Haas ha referì davart l'appartegnientscha da Domat a l'Imperi habsburgais e sias perditgas

DA GIERI BATTAGLIA

■ **Enconuschentamain appartegnevan las vischnancas da Razén, Panaduz, Favugn e Domat antruras a l'Imperi Austriac. Ils 1819 èn ellas vegnidas surdadas al chantun Grischun sin fundament da la decisiun dal Congress Viennais.** Quest onn festiveschan quels quatter vitgs pia il 200avel anniversari da lur appartegnientscha al Grischun. Per quest motiv èsi l'uniun «Festivitads centenarias dal Signuradi Razén», sut la direzziun da *Pierino Casutt*, che realisescha 27 occurrenzas en fin il 26 da matg cun

la finamira da regurdar la populaziun a l'istorgia da lur vitgs e per festivar duida-main il giubileum.

En quest connex èsi era da menziunar il voluminus cudesch davart l'istorgia dals quatter vitgs, cumparì tar la chasa editura Samedia. A Panaduz vegn plinavant inscenà il gieu en il liber «Amur e libertad». La fin da las festivitads furma l'act festiv uffizial dals 25 e 26 da matg a Razén nua che las uniuns localas organischan ina festa dal vitg cun ina fiera medievale. En il rom da questas festivitads tschientenarias ha referì la sonda passada *Theo Haas* en la baselgia gotica da son

Battesta – dal reminent il patrun baselgia da Domat. Il versà istoricist local ha mussà ad in numerus publicum interessà ils vegls fastizs dals Habsburgais a Domat. El ha relatà tge ch'Onna Maria Bühler ha fatg a Vienna ed ha raquintà tge che er auters numerus abitants da Domat fasschevan en la chapitala imperiala durant il 19avel tschientaner.

Igl era in temp da guerra. Ils Habsburgais battevan encunter ils Franzos. Ils da Domat eran subdits austriacs, per gronda part loials a l'imperatur, cumbain essend confederads da la Lia Grischa. Ils 3 da matg 1799 duai la giuvna dunna

Onna Maria Bühler (1774–1854), armada mo cun in bastun, avair retegni uschè ditg las truppas franzosas che vulevan sa retrair traversond Domat, enfin che la milissa, s'avanzond da la Surselva, aveva pudì sa patrunar d'in chanun ed ha pudì sturnir in u dus inimis.

Questa bravura ha chaschunà ch'Onna Maria è daventada enconuscenta lunsch enturn, da maniera ch'ella è pli tard schizunt vegnida retschavida ad in'audienza privata da l'imperatur Franz I. Per quai è ella viaggiada apostata a Vienna ed anavos, natiralmain tut a pe! Suentar il referat d'in'ura, tant divertivel sco

er infurmativ, ins è sa rendì en il pieren a la sacristia da la baselgia parrochiala, la Baselga sut, per admirar l'imposanta vopna imperiala cun l'evla dubla, la curuna, la spada, la culla dal mund ed il scut dal pèz austriac. Haas ha terminà sia variusa guidada istorica ils 1951, l'onn cura che la funtauna dal vitg è vegnida construïda da nov. Sin la pitga da tala sa chatta ina tavla che fa endament la bravura da la giuvna da 25 onns. La davosa guidada dal vitg ha lieu la sonda proxima a las 10.00 a Panaduz. *Markus Sievi* vegn ad infurmar sur da Panaduz e sia istorgia. La rimnada è avant la baselgia dal vitg.



Pierino Casutt (a dretga), parsura da l'uniun «Festivitads tschientenarias dal Signuradi da Razén 2019», surdond il pled a l'istoricist local da Domat Theo Haas.



La tavla d'onur sin la pitga da la funtauna dal vitg a Domat, la quala regorda a la bravura d'Onna Maria Bühler dals 1799.